




天津六通致行同  
人俱樂書室



左文襄公奏稿卷六十

起光緒九年癸未正月訖四月

目錄

病痊銷假并出省閱視工程日期摺

遵保人才請將道員李光久交軍機處存記畱於兩江簡

用摺

已故督撫遺澤在民懇合建專祠春秋致祭摺

鄂湘引鹽另招新商接辦發給循環三萬引摺

酌加淮軍辦公經費請 敕部立案片

出省勘收水利工程摺

查勘范隄工程并籌辦情形摺

奏稿卷六十目錄

籌修運河隄工摺

遵保廉吏摺

查明黃思永上海參款緣由摺

商人請開青龍山煤礦業經先期禁止摺

江蘇防營正雜餉項仍循准銷成案造報摺

拏獲教匪訊辦飭屬搜捕摺

長江提臣請暫駐太平府相機籌辦片

籌辦海防會商布置機宜摺

委員辦理機器製造局務片

輪船水勇請仍照舊章辦理摺



添造兵輪預籌駕駛人才派員教習片

新造開濟快船弁勇人等月支薪銀懇 敕部核復遵辦片

籌銀增助國子監及金臺書院膏火片

已故漕臣遺愛在民懇 准建專祠春秋致祭摺

江蘇防營請從緩裁改摺

飭造輕快船隻巡緝邵伯湖一帶片

病痊銷假并出省閱視工程日期摺

光緒九年正月十六日

奏爲微臣病勢稍減如期銷假并出省閱視工程日期恭摺仰祈  
聖鑒事竊臣前因病勢增劇籲懇開缺回籍光緒八年十月十三  
日奉

上諭左宗棠著賞假三箇月安心調理無庸開缺欽此當卽具摺  
叩謝

天恩聲明俟假期屆滿再行據實自陳奉

旨知道了欽此欽遵各在案緣臣之舊病已積有歲時本難望其  
痊愈上年閏伍回省因積受暑溼復增新疾腰腳支離動履維艱  
深恐貽誤公務是以籲請開缺調理冀蒙

奏稿卷六十

一

福庇幸而獲痊仍當隨時自效蓋受

恩深重義無可辭託病圖安非其志也自蒙

聖慈寬予假期三月以來延醫調治頻進補劑適江西撫臣潘霽  
赴任路過金陵爲之診脈立方據稱加進淺朮自可獲效入春以  
後病勢尙無增加脈息照常仰蒙

逾格矜恤暫免他虞謹卽如期銷假所有假期以內應辦公事均  
已力疾部署幸無積壓以後照常辦理自可按日程功按兩江要  
政以海防爲重而治水行鹽兩大端又爲海防經費所自出近行  
票運已有成效可觀據運司稟報湘鄂岸新商所領鹽票讓各舊  
商承領舊商照章承認彼此無異已飭赴湖北督銷局銀票互交

別無膠葛向之龐雜議論盡化雲煙一俟該局咨稟前來當准銷  
結容再另摺詳陳治吳諸策治水爲要轄疆以內水利工程經上  
年次第施治賴淮楚諸軍之力同時合作一氣呵成計已成之工  
十得八九見仍駐工營作晝夜靡閒弁丁齊心振作未肯告勞本  
省紳民同聲感頌大約全工可於春間告蒞其仍需陸續補綴者  
不能不俟之秋末冬初也見據各道府先後具報揚屬隄工上年  
所辦之周家莊西隄六安閘鐵牛灣崇家灣入堡腰鋪等處東隄  
又邵伯西岸至瓦窰鋪緯道工程均已完竣本年接辦馬棚灣西  
隄又擇修寶汜永高甘江等汛東隄赤山湖工自東之道士壩起  
歷蠡子壩至西之麻培橋已於十二月初四日挑挖完工見接挑

奏稿卷六十

二

三汲秦淮兩河以殺下游之勢朱家山河工關係滁州來安全椒  
江浦六合五屬水利得失能一律疏濬農商實兩受其益而地段  
較長中復橫互石脊從前所以旋作旋輟者以此適臣所帶親軍  
及淮揚鎮總兵章合才各營素諳工作淮軍各營相觀而善尤異  
常勤奮踴躍爭先故能收同役同心之效其省城內外河道開工  
則藩司梁肇煌鹽巡道德壽會督省標及城守弁兵脩築亦可次  
第竣工臣擬於正月中旬先赴赤山湖朱家山驗收工程開印後  
卽以次分赴下游淮揚一帶周歷閱視與承辦各員面商機宜俾  
咸永利而長江礮臺及江海防務案內續脩工程并沿海沿江有  
應添水礮臺者擬順便巡視詳爲部署期收未雨綢繆實效臣出

省後所有署中日行事件交藩司梁肇煌代拆代行緊要者仍包封由臣行次辦理除將回省日期及各工情形再行分別具陳外所有微臣病勢漸減如期銷假并出省閱視工程日期緣由理合恭摺陳明伏乞

皇太后

皇上聖鑒訓示謹 奏

軍機大臣奉

旨知道了欽此

光緒九年正月二十二日

奏爲遵保人才恭摺仰祈

聖鑒事竊臣恭讀光緒八年十一月二十八日

上諭爲治之道首在任用得人際茲時事多艱需才孔亟允宜博訪周諮以備擢用內而部院大臣外而督撫大員各有以人事君之義平時見聞所及如有器識閎遠才守兼優之員素所深悉者著各舉所知出具切實考語秉公保薦不得瞻徇情面及徒採虛聲濫登薦牘用副朝廷延攬眞才至意欽此仰見我

皇上於求賢若渴之中端其始進預防浮濫至意欽佩難名竊維

奏稿卷六十

四

人才之盛衰攸關世運之隆替而人才如取其備則周於德者或拙於用變之時優於才者或難免於求全之毀則識才貴有其眞用才期各當其可也若徒瞻情面徒採虛聲則上以實求下以虛應不但非臣下以人事君之誼卽返求諸己亦覺寤寐難安臣自忝預軍事以來除戰事各大保案不能不據各統將開單請獎外若隨摺列保者亦必加以詳慎舉所聞見出具考語不敢稍存私見自取愆尤至於甄別人才攸關薦達則尤必再四詳審然後註考未敢稍涉疏忽自慙無知人之明自信尙無過情之譽歷數十年保案具存猶堪覆按也茲欽承

明詔垂詢敬舉所知上陳仰備

朝廷採擇鹽運使銜浙江補用道候補知府兼襲三等男李光久  
係前浙江藩司三河殉節

予諡忠武李續賓之子忠義後嗣眾望攸歸不僅戰事見長其器  
識閎遠才守兼優人所共仰卽以戰事而論亦膽識冠軍英偉出  
眾見在臣軍總理親軍營務接辦兩江全省農田水利事務均極  
周妥此次隨帶勘收沿河工程兼察江海防務冀可稍代臣勞勩  
臣不逮此外質地絕好堪資造就者尙不乏人容俟歷練稍深察  
看具保斷不敢草率塞責致負  
朝廷求才至意可否仰懇

天恩准先將李光久交軍機處存記畱於兩江

奏稿卷六十

五

簡用伏候

聖裁所有該員履歷鈔錄恭呈

御覽伏乞

皇太后

皇上聖鑒訓示謹 奏

軍機大臣奉

旨畱中欽此

已故督撫遺澤在民懇合建專祠春秋致祭摺

光緒九年正月十二日會江蘇巡撫衛榮

光銜

奏爲已故督撫遺澤在民籲懇

天恩俯准合祠致祭以彰蓋績而慰羣情恭摺具陳仰祈

聖鑒事竊據江甯布政使梁肇煌詳據江甯府知府趙佑宸詳據金陵紳士候選知縣舉人汪士鐸等稟稱恭閱邸鈔光緒八年六月初三日奉

上諭侍郎夏家鎬等奏蓋臣遺愛在民撥案請建專祠一摺已故欽差大臣署廣西巡撫林則徐前在江甯布政使任內時值該省水災試辦倡捐資賑等事迨升任江蘇巡撫推廣於蘇松各屬并

奏稿卷六十

六

以上元等處被祲尤深請帑賑濟復選任賢員悉心拯救民困獲蘇其辦理文闡監臨釐剔弊端著爲成法平日緝拏匪徒摘發如神洵屬惠政及民著准其於江甯地方建立專祠以彰蓋績該部知道欽此伏思林則徐由江甯布政使升任江蘇巡撫時值陶澍總督兩江於一切

國計民生和衷共濟實有古大臣風而陶澍莅任十年之久勳業事績史策昭垂當日德教沛然感人甚深惠政甚溥追懷遺澤民不能忘見在林則徐既經侍郎夏家鎬等奏奉

恩旨建立專祠所有陶澍與林則徐同時事功如一擬請奏明合祠致祭以彰崇報等情前來臣查陶澍之督兩江也於地方應辦

事宜如籌漕運整飭綱修水利立學校諸大端皆次第施行當議改兩淮鹽法之時震撼危疑異論蜂起卒能堅持定見救弊扶衰上荷

宣宗成皇帝鑒諒允行成效昭著尤爲時論所推重其時林則徐任江蘇巡撫該前督臣與之籌創海運興脩水利整飭鹽務辦理荒政推求至當彼此和衷共濟措正施行論者謂其規模宏遠條理縝密志同道合有非尋常所能窺測擬議者當時名業爛如至今談者猶深慨慕臣忝司疆寄距二臣在位已五十餘年而流風善政猶存輒不勝景行仰止之慕查陶澍曾奉

敕建專祠於淮北之板浦場江甯紳民祀之省城惜陰書院并奉

奏稿卷六十

七

旨於省城地方建立專祠兵燹祠燬克復後修建書院奉主以祀茲據該紳士等追思陶澍林則徐遺愛維同籲請於省城新造東街建祠請并祀兩臣情詞懇切合無仰懇

天恩俯准將陶澍與林則徐在於江甯省城合建專祠春秋致祭以彰蓋績而順輿情除將送到陶澍政績清冊咨部查核外謹合詞恭摺具陳伏乞

皇太后

皇上聖鑒訓示謹 奏

軍機大臣奉

旨著照所請該部知道欽此

鄂湘引鹽另招新商接辦發給循環三萬引摺

光緒九年正月二十二日

奏爲淮南鄂湘前加新票另招股商照繳票價給發循環三萬引以符部議而順商情恭摺仰祈

聖鑒事竊淮南引鹽前經臣奏加鄂湘新票十五萬引原以稽諸舊額短缺前十數年來未經規復而新商踴躍爭先捐輸鉅款又

於

國計不無裨益是以一面奏請加額一面咨商川楚兩省將久假未歸之引地一律歸還川楚督臣如果不分畛域復淮引地助淮緝私前次准加之十五萬引暢銷於荆宜五府一州淮課由此充盈商竈由此繁富乾隆嘉慶之盛規未始不可復覩於今日乃四川督臣丁寶楨僅允每月減讓一二百引尙屬空言并非實事湖廣督臣涂宗瀛一意袒護川鹽爭斷不致少之餉項忘必不可廢之成規以致引地絲毫未復新鹽無路拓銷商情畏阻上煩宸廑其咎固不在增引之驟而在復淮之難也明矣接准部咨以引地未能全復遽加三百票恐不能按輪銷竣不若由漸而來新商已繳銀六十萬兩應准加票六十張倘新商不願承領應令舊商認繳銀六十萬兩發還新商等語是臣辦理掣肘情形部臣亦已洞悉茲據兩淮運司孫翼謀署淮揚海道徐文達具詳新商賀全福等三十四商以十五萬引減爲三萬引每票繳票費一萬兩

奏稿卷六十

八

眾商意見參差無力承運稟請退票由司另招股商和致祥等十

五商接辦飭令局員傳同面詢一退一認皆出情願由和致祥等繳銀六十萬兩歸還賀全福另給和致祥等循環三萬引以二萬引歸鄂以一萬引歸湘分別綱分挨次給運是舊引既不致占礙新票可按輪售銷商情帖服眾論翕然核與部臣收銀六十萬加票六十張之議適相符合而賀全福之票既經退出從前之謠詠紛紜亦已不煩辯論而自解矣惟賀全福等前次繳捐後經臣奏明一面收銀一面辦運且恐引地一復到此需鹽長江路遠不能不先行起運此次接到部文臣比飭運司於奉文日截數據報運出鹽七十九票合三萬九千五百引已運之鹽有到岸銷訖者有早經開江者均祇准一次爲止此後歸和致祥循環轉運所有鄂

奏稿卷六十

九

湘另招新商發給循環三萬引緣由理合恭摺覆陳伏乞

皇太后

皇上聖鑒敕部查覈謹 奏

軍機大臣奉

旨戶部知道欽此

酌加淮軍辦公經費請

敕部立案片

光緒九年正月二十四日

再駐防江蘇淮軍各營米價經臣分飭各統領按照時價扣算發給并聲明酌加辦公經費以所統之營多寡估給公費等因於光緒八年十月初五日附片具奏奉

旨知道了欽此轉行欽遵在案茲查提督唐定奎統領銘武馬步十三營一哨原月支統領薪費夫價銀三百九十兩每月酌加公費銀五百兩自光緒八年八月分起支提督吳宏洛統帶武毅右軍五營原月支統領薪費夫價銀一百三十兩每月酌加公費銀三百兩自八年七月分起支提督曹德慶統領江蘇慶字五營二哨原月支統領公費夫價銀一百三十兩每月酌加公費銀三百

奏稿卷六十

十

兩自八年十月分起支以上各營從前購發軍米先後月分不一是以加給公費銀兩均從米價改照新章扣算之月起支以資辦公茲據金陵軍需報銷總局司道詳請附奏前來臣查江蘇水利工作等事借資於勇力者十居八九幾於無歲無之所省官款實已不少各統領於操防之餘兼顧民事迭辦鉅工咸屬異常出力營中辦公費用亦因之而愈繁見在米價改照時值核扣權其出入原定薪費夫價銀兩實屬不敷貼補是以由臣體察情形奏請酌加公費業經奉

旨允准見分別加給之數皆係從儉科算爲各該營必不可少之需未敢稍任冒濫各勇丁業已均霑實惠歡頌同聲又知此舉爲

統領應得之款卽實惠所由來益深感奮亦再無希冀之心相應  
請

旨敕部立案以便造報除咨部查照外理合附片陳明伏乞

聖鑒訓示謹 奏

軍機大臣奉

旨該部知道欽此

奏稿卷六十

七

出省勘收水利工程摺

光緒九年三月初四日

奏爲出省勘收大江下游水利工程回省復勘朱家山赤山湖水利江南漕運商務農田均有成效可觀恭摺具陳仰祈

聖鑒事竊臣於光緒九年正月十六日恭摺銷假并擬中旬出省親赴各處驗收工程各緣由奏奉

諭旨知道了欽此欽遵在案臣將署中日行事件飭交布政使梁肇煌代拆代行牌傳沿江各道府州縣及各防營各於轄境營汛守候隨同履勘以備諮考正月二十四日乘坐祥雲輪船歷上元丹徒丹陽江陰靖江寶山上海儀徵江都甘泉泰州如皋通州東臺鹽城高郵寶應各屬二月十八日閱視朱家山工程回省料檢署中積牘稍資休憩二十七日復出省勘收赤山湖工程二十九日由三汊河順流至通濟門回省竊維江南要政以水利海防爲急前明名臣有若夏原吉周忱海瑞我

朝治吳有聲績者推陳鵬年陶澍林則徐皆名顯當時功垂後世誠以民爲邦本食爲民天水利興而後旱潦有備民得所養民得所養而後禮義廉恥由此興尊親樂利之心由此篤民心定民力紆官司有所恃以爲固更得精兵利器輔之自可銷奸慝之萌折驕寇之燄由是言之水利固關繫

國計民生亦實海防根本臣自履任以來日以兩事自課而苦於經費無措不得不於鹽務籌之惟課釐正項不敢擅請致煩周折

定擬於票費按引定價隨時批發藩運兩司專款存儲聽候指撥  
比積有鉅款始飭沿江各州縣將所轄之水利分別官修民修大  
舉興辦其屢遭兵燹民力實有不逮者飭各統領營官代其工作  
或爲之倡導同時并舉時閱一期而後成效始有可觀臣此次親  
臨勘驗沿江而下歷裏河下河以抵海壩各鹽場復勘驗范隄馬  
棚灣車邏壩清水潭諸要工均結實飽滿較上年加高培厚宣洩  
有資惟朱家山河工關係滁州來安全椒江浦六合各州縣農田  
水利石工土工既鉅且要致力殊多掘淤泥八九丈露出一碑爲  
嘉慶七年前江甯布政使康基田所立碧泉碑康後官河督亦著  
聲績碑中所言治河要略與今無異碑下石骨犖确句連兩岸石

奏稿卷六十

三

質稍酥嫩者尙可用工錘鑿堅者非火藥轟之不可適前福建布  
政使王德榜假歸道過金陵邀其前往相度并令指麾舊部之見  
隸親軍者助力一任其難庶幾成此一簣之功卽樹數百年之  
績水利倖成則沿江下游一帶旱潦無虞歲穫常稔不但民食充  
裕且可汎舟出糶而民富兵強日臻甚盛矣合併聲明所有治水  
工程已有成效可觀理合據實陳明其防海機宜另行具摺詳細  
陳奏以清眉目伏乞

皇太后

皇上聖鑒訓示施行謹 奏

軍機大臣奉

旨知道了欽此

奏稿卷六十

西

查勘范隄工程并籌辦情形摺

光緒九年三月初四日

奏爲微臣親赴鹽場查勘范隄工程及籌辦情形恭摺仰祈

聖鑒事竊臣於上年三月間奏淮南通泰二十場應行修隄築墩

一片欽奉

寄諭通泰場地隄墩年久失修一遇風潮驟至竈戶倉猝被災情形可憫自應速籌修復卽著左宗棠督飭官紳集費興工覈實辦理俾資捍衛等因欽此遵經派委前署運司見署淮揚海道徐文達專司其事潮墩在范隄以外爲竈戶避潮之所較隄工尤爲緊要先行籌款興工應修者修之應復者復之并有舊地未宜應行改建者斟酌而量移之總計通屬之豐利掘港呂四餘東餘西角

奏稿卷六十

五

斜拚茶等七場共築潮墩五十座泰屬之伍祐新興草堰廟灣丁溪等五場共築潮墩四十四座於六月十八日起至七月初八日止次第報竣派委驗收高寬如式一律堅固去夏大汛泰屬各場閒亦猝被風潮而竈戶得所棲止化險爲夷已收微效范隄工段較長先因積潦未能勘估秋後潮墩告葺積水漸消始派委員分途勘辦徐文達旋亦交卸運司親赴各場通籌布置查得泰屬各場田蕩廬舍類居腹裏距海已遙卽如七年分猝遭颶風蕩地受災尙不十分喫重至濱海竈丁皆居隄外竈戶利在就滷不宜隔闔滷氣見築潮墩皆就埧竈適中之處擇要建立基布星羅此後設遇風潮隨處有墩可避是以泰屬隄工可從緩辦若通屬則地

勢迴別柝茶豐利等場舊隄去海不過數里潮潮相應直達隄根  
角斜掘港呂四等場皆有當衝險要之處煎丁於大汛時每移家  
於隄內而於隄外煎鹽水漲則避之習以爲常隄內之田廬民命  
尤恃隄爲保障年久失修隄身單薄兼有卑薄坍塌之處每逢伏  
秋盛漲情形岌岌可危亟須乘時興修一律加高培厚飭據委員  
估報豐利柝茶角斜掘港呂四五場統計工長一萬一千七百八  
十四丈一尺共估土十九萬七千六百二十九方四分二釐約需  
錢十二萬六千餘串此外如豐柝連界內之小洋口石涵柝茶場  
之稽隄凡刷傷殘缺之處并飭一體修整於上年十一月初十日  
起先後呈報開工每場分作十數隊每隊派委一員督率經理值

奏稿卷六十

去

此春融氣暖百堵皆興臣自上海回揚率同運司孫翼謀督辦隄  
工徐文達由泰州如皋而達柝茶親赴各工逐細履勘民夫雲集  
異常踴躍未成之工經臣面加策勵各工員互相勉勸冀可共覩  
厥成惟場地沙土鬆浮較諸運河隄工夯築倍費工力應用石礮  
先經徐文達分赴各處租雇并由總局多置新礮發工應用夯礮  
結實錐試飽滿自期一勞永逸各場紳民方因災駭懼茲見長隄  
可禦外潮涵洞可洩內水埽竈蕩田免虞意外感

皇仁之普被扶老攜幼夾道歡呼堪以仰慰

宸廑此項工用係動商捐票費統俟工竣核實開單奏報所有查  
勘范隄工程并籌辦情形理合恭摺具陳伏乞

皇太后

皇上聖鑒訓示謹 奏

軍機大臣奉

旨該部知道欽此

奏稿卷六十

七

籌修運河隄工摺

光緒九年三月初四日

奏爲籌修運河隄工以資捍衛恭摺仰祈

聖鑒事竊查揚屬運河東西兩岸隄工襟帶江淮爲下河各州縣地方保障而西隄臨湖一帶情形尤屬險要歷經前督臣派員擇要分年修築臣於上年春閒責令隄工局候補道黃祖絡會同前署運司題補道徐文達淮揚海道桂嵩慶將周家莊西隄并六安閘鐵牛灣八堡崇家灣腰鋪等處東隄又邵伯西岸至瓦窰鋪繹道各工分別修築完竣嗣值運河水勢泛漲迥異尋常得以化險爲夷實非始願所及見正興修馬棚灣西隄臣已籌款督飭隄工局道員黃祖絡趕緊工作以及運隄應修處所并令查明分段興

奏稿卷六十

六

築臣於正月二十四日出省閱視二月初七日於揚州行次接據道員黃祖絡兩淮運司孫翼謀署淮揚海道徐文達會銜具稟馬棚灣西隄業已興工并查黑魚塘對岸西隄又高家塢民堰土工均關緊要亦經估計興辦至各汛東隄土埽磚石等工經上屆盛漲之後處處受傷要工林立甘江高郵永安寶應等汛閒段有之見已劃分段落遴派員弁分段修築請續撥經費等情前來臣查運河兩隄險工林立見當春水漸生亟宜乘時趕辦所需經費統照修隄成案於江甯藩庫兩淮運庫江安糧道庫及軍需局四處按數分撥責令該道等核實經理以收實效所有籌修運河隄工緣由謹恭摺具陳伏乞

皇太后

皇上聖鑒謹 奏

軍機大臣奉

旨知道了欽此

奏稿卷六十

遵保廉吏摺

光緒九年三月初四日

奏爲遵保廉吏恭摺仰祈

聖鑒事竊臣恭讀光緒八年十一月二十八日

上諭御史邵積誠奏敬陳管見一摺所請獎廉吏懲劣員禁罰款減差徭各條係爲整飭吏治培養民生起見朝廷澄敘官方以廉爲本內外大小臣工必當潔清自矢方可振作有爲各該督撫旌別屬員痛懲貪墨尤應拔擢廉吏以資觀感等因欽此跪誦之下欽悚難名竊六計上廉古有明訓此而不講則才智適以自累而建樹皆有可疑我

朝名臣如湯斌于成龍陸隴其張伯行諸臣皆以亮節清風後先輝映爲史牒之光諸臣之得有所設施以成其名者蓋

奏稿卷六十

三

聖祖臨御眾正盈朝鑒別精嚴邇言必察有以致之否則不沮於讒慝之口卽沈於下窳已耳烏覩所謂建樹在當時聲施在後世乎謂諸臣操履清嚴由於學有本原固也然本學術以著經猷亦必資歷練以增其才識非僅砥礪廉隅涇涇自守者可比湯斌之撫吳也時以入薳黃連豆腐湯目之謂其清而有益於元氣也陸隴其之宰嘉定也以嚴其宰靈壽也以寬嘗以處處樹立界限事斟酌分寸自勉張伯行之撫閩也參劾阿山噶禮之奸貪天下仰望丰采尤以造士育才爲亟鰲峰講道實開八閩風氣之先一時學問如蔡世遠經濟如藍鼎元翩翩繼起是其治事之才任事

之氣皆由有本原之學也今若求如諸先臣者一時未可必得緣  
學術不明世教久廢遽期其風節足比古人抑亦難矣然求其矯  
然異乎流俗者則亦未嘗無其人就臣所知如二品頂帶改畱江  
蘇補用道王加敏義利分明條理秩然操履之嚴歷數十年如一  
日人無閒言臣嘗稱其廉由於勤也鹽運使銜改畱江蘇補用道  
周崇傳儉慤性成痛絕浮靡習氣署甘肅鎮迪道時官署未嘗舉  
火惟就市買饅餅充飢以茗湯款客自飲涼水公服之外惟敝裘  
一襲臣憐其過苦飭支應處酌給津貼後調署平慶涇固道因道  
缺本有津貼銀兩乃照例受之仍撙節寄家置田數十畝俾其弟  
姪躬耕自給而後老母始免操作之勞嗣遵調來兩江未改常度

奏稿卷六十

三

僚友皆知敬畏亦頗疑其矯情臣每勸其開拓心胸勿僅以操守  
一端自見致遭流俗之忌然性之所近習而安之如故也同知銜  
江蘇補用知縣吳錫震湖南平江縣人臣在籍時久聞其立志希  
古不隨流俗胡林翼撫鄂招其入幕深加器重欲獎進之吳錫震  
以受知不受恩自矢未嘗干求保舉每聞戰事敘勞列保輒預辭  
不就故官聲漸著資格已深未嘗補一實缺也其淡於利祿如此  
胡林翼與臣函常稱道之謂非他人所易及光緒四年委署荊州  
府宜都縣篆廉勤樸實大得民和因不得於荆宜施道孫家穀竟  
以聽斷粗率操守平常署考湖廣督撫臣據以參劾宜都士民駭  
然羣思挽畱之不得臣比奏調赴甘劉錦棠亦知其志節有異調

赴新疆奏准開復原官分省補用八年臣調其赴江南察其居心行事狷介如故畱充隨員是與周崇傳皆以儉而成其廉者至兩江屬吏中如署高郵州知州龔定瀛署上海縣知縣黎光旦皆爲守兼優政聲漸著本擬一併列保究以同鄉後進恐人議其私也意俟其歷練稍深眾論翕服始敢據實入

告近來江南吏治振興臣廉得數人已於公牘中深加褒許咨俟詳加考核再行陳奏所有遵保廉吏緣由謹據實直陳伏乞

皇太后

皇上聖鑒訓示施行再兩江向無罰款名目差徭已逐漸釐定其牧令聲名稍劣者已經臣與撫臣隨時指劾具奏見尙無貪濁著

奏稿卷六十

三

名之員合併聲明謹 奏

軍機大臣奉

旨畱中欽此

查明黃思永上海參款緣由摺

光緒九年三月初四日  
會江蘇巡撫衛榮光銜

奏爲遵

旨確查據實具奏恭摺仰祈

聖鑒事竊臣等先後承准軍機大臣字寄光緒八年十二月十六日奉

上諭有人奏修撰黃思永與革員姚寶勳在上海夥置洋房物議紛紜請敕查參等語所奏是否屬實著左宗棠衛榮光分別確查據實具奏原片均著鈔給閱看等因欽此當經臣等遴派委員會同上海道嚴密確查迭據先後稟復臣等互相印證逐加察核已得其概謹據實爲我

奏稿卷六十

三

皇太后

皇上陳之查上海所傳黃思永置買房屋凡三處一在長鑫里卽三鑫里一在祥春里一在繪芳樓先據革員姚寶勳之存養公司管事姚恩緒等稱該公司并無黃思永股本在內復據代黃思永經手買屋之戚朱錫康稱黃思永只於三鑫里自置住屋一所其祥春里繪芳樓兩處係朱錫康自置之業均與黃思永無涉復加細訪乃知原參各節不爲無因緣祥春里繪芳樓兩處其先原係姚寶勳之產後因利息甚薄始賣歸黃思永管業該兩處屋價甚昂黃思永存資所短尙鉅多方挪湊始得成交時黃思永實未出面概由姚存養公司代爲經理立摺取租去秋姚寶勳奉

旨查參後始改由兆豐德和兩洋行代收至三鑫里皆係正經莊號祥春繪芳兩處其中租有妓寮數家此黃思永置買房屋與姚寶勳形迹軼轉之實在情形也臣等查姚寶勳在上海租界購造房屋多處當上年奉

旨查辦之時未聞有黃思永股本在內此次據朱錫康呈出三鑫里契內有慎記字樣而祥春繪芳契則載有賣與朱處字樣亦未便卽據以爲憑第思置買房屋放租取息本屬尋常之事無論多寡尙無足異黃思永既有其戚朱錫康可託何必轉託他人其由姚存養公司代爲立摺取租顯係朱錫康輾轉詭託黃思永供職都門相隔數千里一切均係託人代爲經理其租賃者爲何如人

奏稿卷六十

五

勢難一一周知無足深怪惟詢諸江甯士民頗言黃思永少時遭髮逆之變江甯城陷全家殉之黃思永時亦被創鄰人覓得思永於父母積屍之下撫之一息僅屬乃以湯藥調治引避山中比長發憤讀書連掇科名人咸目爲節義之報茲旣名列清班忽以急於治生致招物議雖由一時失於檢察咎實難辭應如何量予懲警之處伏候

聖裁所有查明黃思永上海參款緣由謹合詞恭摺覆陳至原參廣東各款應由廣東覆奏合併聲明伏乞

皇太后

皇上聖鑒訓示謹 奏

軍機大臣奉  
旨畱中欽此

奏稿卷六十

三

商人請開青龍山煤礦業經先期禁止摺

光緒九年三月初五日會銜

奏爲商人請開煤礦業經先期禁止以杜覬覦而靖閭閻恭摺覆

陳仰祈

聖鑒事竊臣承准軍機大臣字寄光緒九年正月二十四日奉上諭詹事府右庶子汪鳴鑾奏上年江蘇銅山縣境試開鐵礦近有奸商魏姓援銅山之案復欲在江甯鎮江交界之青龍等山開挖煤斤鐵沙請敕查禁等語青龍山等處密邇金陵豈容任意開挖煤鐵各礦著左宗棠衛榮光訪查飭禁其沿江沿海未經奏准開礦之處并著一概禁止以靖閭閻原片均著鈔給閱看等因欽此仰見

奏稿卷六十

美

朝廷於爲民興利之中仍寓杜漸防微之意欽佩難名查江蘇青龍山有二一在上元縣一在句容縣先於光緒六年間據丹徒縣紳士翰林院侍講學士李承霖江甯紳士前戶部右侍郎溫葆深等先後呈稱以奸民屢於江甯鎮江兩府屬請開礦務迭經各前任批駁仍請勒石永禁以杜後患當經前督臣劉坤一批飭江甯鎮江兩府於府縣學門外勒石永禁在案上年九月間復有浙商魏振元等在臣衙門兩次具稟請開句容縣青龍山煤礦卽經臣查照前案批駁飭府督縣查明該山有從前墳墓實屬未便開挖并由府附呈溫葆深等所開摺略請予再加碑禁各情復經臣批飭江甯府移會鎮江府將此次申禁各節一體於府縣學門勒石

永禁亦在案是青龍山開礦一事業經臣先期示禁此後惟有懷  
遵

諭旨凡沿江沿海未經奏准開挖處所一概禁止不令牟利之徒  
從而生心上副

聖主綏靖閭閻至意至此事并未准舉辦該處士民尙無驚駭惶  
惑情事足以上慰

宸廬其銅山縣境煤鐵礦據徐州道程國熙飭由候選知府胡恩  
變延聘洋礦司勘驗確實始奏明開採該礦山地處江境極邊於  
田舍廬墓并無窒礙且工作均定本地價雇不許外處人夫攙雜  
具有條理見正集股購器事有把握非該商等所得援以爲請者

奏稿卷六十

三

也所有商人請開煤礦業經先期禁止緣由理合會同江蘇巡撫  
臣衛榮光恭摺覆陳伏乞

皇太后

皇上聖鑒訓示謹 奏

軍機大臣奉

旨知道了欽此

江蘇防營正雜餉項仍循准銷成案造報摺

光緒九年三月初六日會銜

奏爲江蘇防營正雜餉項數目仍循准銷成案造報恭摺具陳仰

祈

聖鑒事竊准部咨議復御史梁俊等奏軍需善後報銷內外辦法一摺於光緒八年十月十五日具奏奉

旨依議欽此飛咨欽遵辦理等因當經轉行遵辦去後茲查部議原奏外省報銷章程十四條除無關江蘇防營收支造報六條又嗣後糧臺局員限三箇月先開職名一條應由經辦各委員徑行開送報部又戶兵工部應銷之款不必互入冊內一條又各省報銷仍按舊章一年者限次年八月到部一條均應分別遵辦又各

奏稿卷六十

三

營欠餉一條另行專案辦理除軍需善後應分爲二端光緒九年以後毋庸仍前軍需名目一條業將軍需報銷各局更改名目於光緒九年正月二十四日專案附片具奏外尙有應行奏明立案者三條一原奏各省防軍兵勇數目凡從前未經奏明營制口糧軍火雜用等項者統限三箇月奏報以後隨時增裁勇數餉數者隨時奏咨立案倘不依限奏明或兵勇餉數與原案不符者概不准銷等因查江蘇防營馬步水師營哨官弁勇夫員名總數駐防處所歷經按年造冊報部至光緒七年年年底止其八年十二月底止仍請循案造送外自九年春季起遵照新章按季造冊報部一次并將薪糧正雜各款有無增減另開清冊同送至各營支給薪

糧等項截至光緒八年十二月底止正襍各款按照歷屆准銷成案及准軍餉章分晰彙開清冊咨部查核以符新章一原奏各省向係造冊者仍舊造冊送部核銷統由部臣查照該省奏明原案兵勇數目支餉數目核算有案者准銷無案者議駁與見定章程相符者准銷不符者議駁等因查江蘇雷防軍需用款向係按年造冊報銷業經造報至光緒七年十二月底止列爲第十案奏咨在案除營哨官弁勇夫支餉各數見經分晰彙開清冊送部外嗣後仍循舊按年造冊於次年八月依限送部核銷以符新章一原奏各省設立機器局購買外洋槍礮電綫等件日新月異部中無憑稽核閩廠輪船分撥江南等處各省報銷薪糧亦各有參差雖

奏稿卷六十

五

奏報均稱實用實銷仍難免局員浮冒朦混之弊總計常年經費若干如有添購機器經費若干雖不能限以定數亦當立有範圍事前奏明報部立案事後方准報銷等因查金陵省城設立機器製造局收支用款係由該局造冊送由南北洋大臣專案奏銷江蘇雷防軍需案內并無機器製造局用款至購買洋槍洋礮子彈火藥銅火等件由經管委員隨時稟准後與洋商按物之粗細查照外國廠價臨時議購故無一定用款亦無一律價目雖例所不及而支給惟期核實擬請嗣後自九年正月起添購外洋軍火無論鉅細用款名目件數價值隨時專案呈報咨部查考以便造報茲據辦理金陵軍需報銷總局見改名江蘇善後防營報銷總局

江甯布政使梁肇煌安徽候補道石楷江蘇候補道孫傳樾詳請具奏前來臣覆核無異相應請

旨敕部查照立案除將送到江蘇防營餉項各冊及楚軍營制馬勇刊章分咨戶兵二部查核外理合會同江蘇巡撫臣衛榮光恭摺具奏伏乞

皇太后

皇上聖鑒訓示再江蘇甯防老湘合字七營每營修整洋槍工匠一名月支口糧銀五兩又兩江督標新兵五營淮揚鎮標狼山鎮標新兵共七營每營洋槍教習二名每名月支口糧銀七兩修整洋槍工匠一名月支口糧銀五兩又湘淮各軍隨營辦事并兩江

奏稿卷六十

三

營務處及支應轉運差遣文武員弁時有增減所支薪費夫價各數係按差事繁簡酌定多寡不一又江防淮軍馬隊三營一哨係照銘軍初定馬隊編立員名支數章程給餉經署北洋大臣李鴻章批飭自光緒九年正月起遵照馬勇刊本章程改編給餉并照淮軍准銷成案准給雇車五輛月支銀一百兩之外每營酌加長夫五十名各日支口糧銀一錢又江防淮軍步隊各營報存駝騾每隻頭日支餵養銀一錢向係每營給銀一百兩及一百五十兩不等嗣因倒斃既多飭委查驗存營確數以爲定額按每駝騾一頭日給餵養銀一錢又江防淮軍步隊各營領操各磅洋礮配用行架并車箱鞍套物件量分等差酌定每尊月支油飾礮費銀二

兩八錢四兩五錢不等以上各款係歷經准銷有案合併聲明謹  
奏

軍機大臣奉

旨該部知道欽此

奏稿卷六十

拳獲教匪訊辦飭屬搜捕摺

光緒九年三月二十五日會漕運總督慶裕江蘇巡撫衛榮光銜

奏爲山東教匪句煽海沭安桃一帶匪徒謀逆見已拏獲習教傳徒匪目解省訊供懲辦加派文武帶領營哨馳赴犯事地方搜捕匪犯以靖地方而速敕定恭摺馳陳仰祈

聖鑒事竊臣等接據淮揚鎮總兵章合才署淮揚海道徐文達稟稱本年二月間訪聞海州沭陽安東桃源各州縣北路有外來教匪潛入屬境習教傳徒情事煽聚日多民心惶恐羣議移家避難一夕數遷旋由該鎮道等飛飭海州文武密速掩捕首要各犯以定民心先後於清河沭陽捕獲道士晏儒棟卽晏圓光崔華及華景沂三犯解道訊供據稱近時有總教首王覺一卽王養浩又稱

奏稿卷六十

三

王古佛山東人稱係古佛降生手掌有古佛字紋時到海州沭陽安東桃源鄉村倡立邪教名爲末後一著刊布妖書邀人入教王古佛見又赴金陵漢口荊州等處邀約徒黨擇期三月初八日一齊起事臣宗棠立飭將晏儒棟等犯解省審辦一面飭江甯府縣會同保甲局及督捕營密拏王古佛并飭總理親軍營務處道員用浙江候補知府李光久卽日督帶親軍先鋒哨前赴清江浦會商徐文達前赴安桃海沭一帶察酌情形會同章合才分別辦理旋據報章合才到海沭風謠頓息人心始定旋於十五日帶隊回浦是日復接署海州知州丁葆元署參將田恩來稟續獲匪首一名李保中匪黨顏錫俊潘如松高錫懷等八名而安東桃源二縣

均有伏匪聞官軍捕急時思蠕動良民仍懷疑懼章合才於十七日仍率隊馳往是日李光久到浦於次日繼進臣等飭其會商先赴海沐繼進安桃一面查緝匪黨一面延致公正士民就各境辦理保甲團練務期客匪不復入境良民相庇以安然後民心固結正氣常伸可免釀成異患譬猶醫者治病以調護元氣爲先元氣內充則外邪自不能入否則客感紛乘真元日耗而疾終不可爲也此次風謠之起肇自山東據各處獲犯口供及起獲妖書參互考究知其喫齋傳徒偽造經呪一切皆與白蓮教無殊緣白蓮教起自山東之白蓮池臣宗棠前剿捻轉戰直隸大名順德廣平山東武定各府屬境目覩居民皆築有土堡自分氣類良民所居稱

奏稿卷六十

三

白圩其習教者自稱黑圩習爲不法無所顧忌地方官吏惟幸苟安無事不復窮究其奸近聞齋匪哥老會匪及軍營逃勇游勇亦多竄匿其中蔓延日廣北踰直隸南浸江蘇竊恐一旦禍作嘉慶初年三省教匪之案將復見於今日也夫江北各郡縣民風强悍在昔已然此次居民聞謠膽怯竟至挈家分逃不謀而合緣教匪盤結已廣殺機一發震動殊常實有出於尋常意料之外者辦法宜調集官軍厚其勢以臨之一面於獲犯訊供時悉心研究分別治罪其情有可原者立予省釋毋妄殺母株連庶幾民心有所倚信而後舉行保甲勸辦團練內訌既淨外寇無可乘之機寓寬於嚴寓速於緩務期不妄殺以定民心不輕縱以寒匪膽庶幾地方

永保敕平訟獄亦可衰息矣除咨商安徽湖北湖南各督撫臣密  
拏匪首王古佛外一面咨催新授漕運總督臣楊昌濬迅速履任  
緣臣宗棠與其歷辦軍務意見相符就近指揮益資臂助也謹一  
併合詞恭摺馳陳伏乞

皇太后

皇上聖鑒訓示施行謹 奏

軍機大臣字寄光緒九年四月初二日奉

上諭左宗棠等奏拏獲匪犯訊辦飭屬搜捕一摺本年二月閒山  
東教匪王覺一卽王養浩又稱王古佛潛往江蘇海州等州縣倡  
立邪教謀爲不軌并赴金陵漢口荊州等處糾黨約期起事經總

奏稿卷六十

書

兵章合才等先後拏獲晏儒棟等多名惟匪首王古佛在逃未獲  
亟應嚴密查拏著左宗棠涂宗瀛慶裕楊昌濬衛榮光裕祿陳士  
杰彭祖賢卞寶第譚鈞培督飭所屬一體嚴拏務獲究辦毋任漏  
網安東桃源二縣時有伏匪蠢動并著左宗棠等飭令章合才等  
認真緝拏俾免勾結爲患所有應辦保甲團練各事宜務當嚴飭  
文武各官實力舉行妥爲辦理以靖地方將此由四百里諭知左  
宗棠涂宗瀛慶裕楊昌濬衛榮光裕祿陳士杰彭祖賢卞寶第并  
傳諭譚鈞培知之欽此

長江提臣請暫駐太平府相機籌辦片

光緒九年三月二十五日

再臣於光緒八年七月二十九日會同臣彭玉麟等議覆張佩綸籌辦江海防務事宜一摺會請以長江提督分駐岳州府之半年改駐吳淞口俾得江海兼顧奉

旨該衙門知道欽此本年卽應查照奏案辦理惟見在集議就白茅沙地方扼要設防李成謀并擬在該處創製機器錯落布置俾敵船節節阻礙不能速駛以大礮測準轟擊可冀得手白茅沙距吳淞百餘里實爲長江總要隘口於此處設險防守較爲得宜李成謀巡閱長江多年歷練旣深情形極熟見在會籌防務江海并重李成謀見駐太平府聞警順流展輪東下亦可迅赴戎機不必

奏稿卷六十

五

定駐吳淞口方期得勢至分駐岳州尤宜暫緩見惟仍駐太平相機籌辦一俟海防解嚴屆時再照舊章辦理庶於江防海防兩得其宜安攘大略益昭周密矣臣爲體察見時情形慎籌防務起見謹附片陳明伏乞

聖鑒訓示謹 奏

軍機大臣奉

旨知道了欽此

籌辦海防會商布置機宜摺

光緒九年三月三十日

奏爲籌辦海防會商扼要布置分催購製船礮以期有備無患謹將一切機宜恭摺馳陳仰祈

聖鑒事竊自海上用兵以來事勢紛紜未能確操勝算雖閱四十餘年內外極力支持尙無定局誠以泰西各國以經商致富廣造機器增製輪船動輒挾其所長多所凌忽自古談邊防者不外守戰與和而就三者言之亦有次第必能守而後能戰能戰而後能和斯固古今不易之局也泰西各國均以經商爲本務而英吉利爲之宗所以雄視諸國者該國之規模法度較西人本爲整齊又明避實擊虛之略故所向無前不但精製造尙詐力足以震耀一

奏稿卷六十

三

時也惟察英人近時舉動頗有志滿氣驕易視與國之意究亦外強中乾難以持久而江南水陸各軍選練日久兵力漸強雖海外與戰難言遠有把握但籌防邊固圍則尙力所能爲亦有未可因循玩愒坐昧機宜者臣此次乘驗收水利工程之便察看礮臺形勢會集防江防海各軍營將領諮訪方略隨處熟商布置計由下關起歷烏龍山象山都天廟焦山圖山關江陰靖江吳淞各礮臺次第閱視并安設水靶觀其致遠取準驗其礮力藥力之遠近并區別弁勇之材否技藝之生熟將士均踴躍殊常各將領知臣赴前途察看形勢均請隨行臣欣然許之竊聞言江海防務者莫不以吳淞口爲總要蓋以吳淞口爲進黃浦江之路由此可以問途

蘇松也然敵船不進黃浦江即可不由吳淞入口但由崇寶沙寶山縣繞白茅沙便可掠狼山福山徑犯長江是狼福兩山雖爲長江門戶而白茅沙又居狼福之前尤長江總要門戶也白茅沙江面寬闊左右沙綫密布沙縫無定舟行過此必謹避跑沙倘或誤觸跑沙船一擱淺立爲浮沙壅沒卽成沙堆上年有洋船誤陷於此今祇見其桅頂露出水面行人指此猶爲色變其間惟中泓一水稍清寬可二里長可二十餘里堪以行舟於此安設浮筒爲之表識俾不迷於所往然水性如有遷移浮筒仍須移置亦無定處也臣與江南提督李朝斌長江提督李成謀狼山鎮總兵楊明海署福山鎮總兵雷玉春蘇松鎮總兵滕嗣林淮揚鎮總兵章合才

奏稿卷六十

三

瓜洲鎮總兵吳家榜暨同行之文武隨員及副將參將遊擊都司守備等過此停舟沙口會議若於白茅沙安設堅船大礮力扼此津則敵船勢難飛過地險實有可憑詢謀僉同彼此意愜適報彭玉麟查案事畢回棹江陰李成謀章合才等請以輕舸返之二月初四日彭玉麟卽至相與審視慨稱數年前卽擬於白茅沙妥爲布置因製船購礮經費無出遂止臣語以見在籌集儲存已有成數并詳述見派製造者福建輪船局江南上海金陵兩局而所需之洋鋼洋鐵檣木等項物料上年飭委四品花翎德商福克於回國監製兵輪大船之便一併採買俟其解到始能應手計期當在七八月之交製造旣多海程又遠無法速之而南洋兵輪共祇六

號大者惟登瀛洲及澄慶兩船澄慶見已調回南洋其登瀛洲則經北洋大臣奏准暫留天津未能再調回南祇得見在所有船礮扼要設防并催調福建船政局新成之開濟快碰船到金陵覆驗後相機布置聊事補苴就見在辦法言之設險白茅沙扼其總要會諸將領相度形勢各行其心之所知量其力所能及集成全局既協地利又得人和戰事當有可恃延至深秋則設備齊整天時又合自可得所藉手以播

天威惟綜觀往事竊有不能已於言者海上用兵以來文如林則徐忠而有謀以之制初起之寇本有餘力不幸爲忌者所閒事權不屬不克竟其設施武如陳化成力扼吳淞苦戰不卻不幸右路

奏稿卷六十

三

未戰先潰致夷兵萃於左路力遂不支遂以身殉是則議論不協勇怯不齊有任其咎者遺憾至今四十餘年不知伊於胡底而所謂識時務者仍以因循粉飾苟且目前之安此志節之士所爲抱抑塞磊落之懷扼腕歎息者也臣愚竊謂和局可暫不可常其不得已而出於戰乃意中必有之事茲幸地利人和兼而有之而察諸將領又各思發憤爲雄自可及鋒而試因飭一面挑選奮勇弁丁一面嚴明賞罰訂立規程俾互相激勸以齊心力遇有外國兵輪闖入海口不服查禁者開礮測準轟擊得力獲效者照軍功例從優給獎其奪獲船隻者副將以下至外額均加三級請保提鎮請給世職勇丁按名賞銀五十兩仍錄功核保所奪輪船除軍械

及應用器具概應充公不准藏匿外其銀洋什物均報驗充賞不准官弁扣畱以昭激勸其督隊不嚴臨陣退縮甘心失律以致誤事者提鎮請

旨正法副參遊以下至外額屆時由臣察實手刃以徇提鎮氣力漸衰身軀肥重不能縱跳用力者先期自陳應核明具奏免其嚴議蓋職分既崇所重者督率嚴謹不必強以力所不能也至總督親履行間所辦者轄疆江海防務責無旁貸遇有寇警應親臨前敵督戰防所卽其汛地如敵人輪船衝過白茅沙總要隘口則防所卽是死所當卽捐軀以殉此外巡閱長江水師大員及長江提督責在長江未兼洋務自當分別言之未可概論按長江轄境起

奏稿卷六十

五

自江陰而江陰距白茅沙二百數十里實爲江防第二重總要門戶彭玉麟李成謀於白茅沙會商布置後仍當回駐江陰萬一白茅沙之防不幸而有失江陰本從前設防之處船礮頗多兵力不乏彭玉麟李成謀忠義耿耿聲威夙著人望攸歸從容鎮定尙堪背城借一事有可爲亦其職分所當盡謹預先陳明俟有定議再行具奏臣固不敢妄圖一死塞責置江防大局於不顧也至臣經手海防經費奏明在鹽票報效項下支銷已飭隨員江南籌防局候補道陳鳴志隨時登記惟款目繁雜未便敍入致煩

省覽所有此次海防動用各款容卽條舉件繫咨報軍機處總理衙門戶部以備考核謹一併陳明伏乞

皇太后

皇上聖鑒訓示施行謹 奏

軍機大臣奉

旨覽奏均悉所陳籌辦海防情形爲未雨綢繆之計仍著該督隨時妥爲布置以期有備無患見派李鴻章前往廣東督辦越南事宜必須厚集兵力江南防軍何營堪備調撥著卽遵前旨籌畫具奏欽此

奏稿卷六十

早

委員辦理機器製造局務片

光緒九年三月三十日

再江蘇吳縣正紳候選運同潘露天賦異能其氣學與製造一切機器獨出心裁多與西法暗合曾在廣東遵

旨繪畫廣東全省輿圖總辦創建機器軍火局務爲粵人所推服洋匠亦自媿不如江甯藩司梁肇煌在籍時深知其能臣見調至江蘇筭委總理江南上海金陵兩機器製造局密飭先造機器於崇寶沙寶山吳淞口白茅沙各處閒段分設聆其緒論切實近理高出時人總理製作可期工精費省且於江海防務裨益實多如果功效昭著再當據實保獎懇

恩破格錄用以勵人材惟據稱在粵製辦機器未嘗引用洋人聞

奏稿卷六十

聖

上海機器所用工匠頗多其中洋匠亦復不少一時未可挑汰慮多隔閡之虞臣查隨員辦理籌防局布政使銜候補道陳鳴志在兩江辦事多年諳練勤幹熟悉情形深堪倚任已飭隨同赴滬幫同辦理并兼顧金陵機器局務冀資同心之助謹一併附片具陳伏祈

聖鑒訓示謹 奏

軍機大臣奉

旨知道了欽此

輪船水勇請仍照舊章辦理摺

光緒九年四月十四日

奏爲查明南洋大小輪船裁撤水勇改配兵丁窒礙情形據實覆陳恭摺仰祈

聖鑒事竊臣於光緒八年十二月十七日接准兵部咨開以各省輪船請飭裁撤水勇改配水師兵丁一案奏奉

諭旨行文遵照裁改并將各船馬力兵丁餉銀數目逐一造冊咨部查核等因當以南洋大小輪船其中水手人等能否照議改補兵額飭令查明議覆去後茲據統領輪船操練江南提督李朝斌并江南籌防局司道等各將礙難裁改水勇情形及南洋操練之一百二十五匹馬力測海輪船各一百五十四匹馬力登瀛洲威靖

奏稿卷六十

呈

兩輪船五百匹馬力馭遠輪船一百八十匹馬力澄慶輪船八十四匹馬力靖遠輪船各六十四匹馬力龍驤虎威兩蚊船各六十六匹馬力飛霆策電兩蚊船及聽差之六十六匹馬力福安輪船各二十四匹馬力江安澄波兩小輪船均卽確查的係實數并無虛浮先後詳咨請奏前來臣查中國創設兵輪船實爲自強之計大小火輪兵船既與水師舳舻船式不同操作行駛之法又復各別如望測旂號操演槍礮上下桅帆向盤汽表之法更兼遠涉重洋陡遇颶風駭浪凡在船水勇人等倘非平時熟諳西法練習多年而又生長海濱慣習水性者安能得心應手悉臻妥善今若將水師兵丁一旦改配來船其於船中運動之物不知何名何用操作之法

不知何起何止設遇出洋禦敵之時何能必其如身之使臂臂之  
使指心志不一號令難施此裁水勇改配水師兵丁窒礙之情形  
也輪船水勇以船爲家機器時須檢視技藝時須練習此外不敢  
稍令越志今若以水勇改補兵額則本營有應操點隊之規各兵  
有此標彼營之別勢有所分心將不一蓋水勇須熟諳輪船技藝  
方可充補且又從役較苦故較兵丁口糧稍優泰西諸國凡遇熟  
練輪船事務者招致不吝重資今以之改補兵丁卽應照兵額開  
支月餉由多而少勢必紛紛求退挾其頻年技藝轉謀食於洋船  
是楚材而晉用也近聞各省閒有將兵丁配撥船上者然除照領  
本餉外仍酌加津貼銀兩較水勇口糧亦復無異此又將水勇改

奏稿卷六十

皇

補兵額窒礙之情形也刻下海疆多故正整頓防務之時若照部  
議將各輪船水勇分別裁改兵額於本餉之外查照他省章程另  
加津貼其於餉需究亦無甚出入且恐徒事更張轉將數十年講  
求購製之利器致成徒費臣詳悉察核確屬實在情形除將各輪  
船應造清冊另行飭取咨部查核外合無仰懇

天恩俯准敕部將各輪船水勇仍照舊章辦理以免紛更而重防  
務所有南洋大小輪船礙難裁改水勇緣由理合恭摺覆陳伏乞  
皇太后

皇上聖鑒訓示再畱駐天津之八十四匹馬力操江輪船應由北洋  
查明辦理合併陳明謹 奏

軍機大臣奉

旨著照所請該部知道欽此

奏稿卷六十

署



奏稿卷六十

添造兵輪預籌駕駛人才派員教習片

光緒九年四月十四日

再臣前因南洋兵船不敷分布奏明添造大小兵輪船十五號見已飭由閩滬兩廠及向德國商人分別定製數年之內即可先後告成惟駕駛人才選擇甚難必須預爲籌及見在閩廠學堂學生雖通行船之竅要而於一切機宜究未躬親練習仍恐將來調派來船亦難驟期實效臣請將南洋之澄慶兵船作爲練船飭由管駕官遊擊蔣超英在於閩廠學堂中挑選學生十人并招水手一百名來船教以西學練習帆纜一切事宜并使游歷各海口祗席風濤辨識海道定以三年爲限庶可練習精熟將來前項船隻先後告成此等學生水手亦可陸續調用較與臨時招募者得力殊

奏稿卷六十

呈

非淺鮮該船管駕官遊擊蔣超英係由學堂出身并曾游歷西洋精通西學熟諳駕駛以之派爲教習實堪勝任惟練船一設人數倍多每年約增經費銀一萬四五千兩煤炭引港等項在外不能預計其在船之管駕及大副以下員弁有督同教練之責較尋常差務爲繁且常年辛苦與學生同歷斯境擬俟著有成效之日准其擇尤分別從優請獎以爲實心辦事者勸臣爲慎選人才預謀管駕起見除俟遴選學生水手到船另行造冊咨部查核外理合先行附片陳明伏乞

聖鑒訓示謹 奏

軍機大臣奉

旨該部知道欽此

奏稿卷六十

吳

新造開濟快船弁勇人等月支薪銀懇

敕部核復遵辦片

光緒九年

四月十日

再准兵部來咨閩廠新造之二千四百匹馬力開濟快船應配管駕人等若干月支薪糧若干應令明晰奏明俟奉部復核准後再行起支薪糧等因當經咨行船政大臣遵照辦理在案臣查此項開濟快船馬力二千四百匹係屬實數較與別項船身尤大實爲中國所未有者今既調歸南洋差遣所有船上應行配用各項員弁勇丁舵水人等酌量配募計共二百一十員名每月薪糧需銀三千五百一十五兩惟該船一切小件尙須略加整修約計五月內即可蒞事見在該船正當合攏鑲配輪機帆纜之時必須先行委派管駕以及管輪水手人等到船幫同經理庶可使其洞悉船中機器之窳窳繩索絡繹之往來若俟部復到日再行起支薪糧不但尙須時日抑難令其枵腹從公臣思維再四擬將已招在船人等先行按照原定薪銀每名給發一半容俟部復到日再行全給似此變通辦理庶可稍節經費除飭福建船政提調道員呂耀斗遵照辦理并分咨外所有開濟快船應配弁勇水手人等每月支領薪糧銀數謹繕清單恭呈

御覽合無仰懇

天恩俯准敕部核復遵辦理合附片具陳伏乞

聖鑒訓示謹 奏

奏稿卷六十

望

軍機大臣奉

旨著照所請該部知道單併發欽此

奏稿卷六十

吳

籌銀增助國子監及金臺書院膏火片

光緒九年四月十四日

再臣接准順天府尹咨以國子監及金臺書院款項所入無可增益會奏請

旨敕籌銀四萬兩解京發商生息分資國子監金臺書院兩處膏火之需光緒九年二月初一日奉

旨依議欽此恭錄移知欽遵辦理臣維儲材養士本治世之規而首善敷文尤光被之漸竊維國子監暨金臺書院地望本崇英才所匯誠宜及時培養俾儒宗國翰由此而興無負

作人雅化臣前歲忝廁樞垣時曾與祭酒王先謙抗談及此迨承

恩命出督兩江王先謙尤以爲言茲准順天府尹臣周家楣管理

奏稿卷六十

吳

國子監事務臣翁同龢恭錄

諭旨并鈔原摺咨來臣義無諉謝除飭江甯藩司梁肇煌在於庫存鹽票報效項下如數劃提銀四萬兩匯解順天府衙門取具回銷備案外謹附片陳明伏乞

聖鑒謹 奏

軍機大臣奉

旨知道了欽此

已故漕臣遺愛在民懇 准建專祠春秋致祭摺 光緒九年四月十四日會銜

奏爲已故漕臣遺愛在民籲懇

天恩准建專祠以彰蓋績而慰輿情恭摺具陳仰祈

聖鑒事竊臣恭讀光緒八年十一月二十四日

上諭林肇元奏已故大員功德在民懇建專祠一摺已故江蘇巡撫黎培敬前在貴州藩司巡撫任內籌兵籌餉克復城池歷任四川臬司漕運總督亦均克稱厥職黎培敬著准其於貴州建立專祠并加恩予諡等因欽此仰見

朝廷篤念蓋臣有加無已凡屬有位感誦同聲茲復據署淮揚海道徐文達詳稱據淮安府知府孫雲錦詳據山陽縣紳士翰林院

奏稿卷六十

五

編修前湖南學政顧雲臣等清河縣紳士大挑知縣張駿等儀徵縣紳士教諭劉衍等聯名稟稱以黎培敬業經奉

旨在黔建祠而清淮祀典缺如士民戴德之忱猶歉然有所未盡造具事實清冊請於清淮地方建立專祠轉詳請奏前來竊以黎培敬宦績本末林肇元摺內已詳言之

諭旨并嘉其在漕督任內克稱厥職是其治漕政績固久在聖明洞鑒之中茲既據該紳士等合詞籲請謹再據實爲我

皇太后

皇上陳之查黎培敬於光緒六年奉

旨補授漕運總督是年十月到任以爲治漕必先治河受事之始

卽親勘禮字河堵壩情形念此處地形實全局關鍵因年久失修致洪湖大溜全趨高寶勢如建瓴東西兩隄情形岌岌設有疏失秦興秦州諸州縣卽有漫溢之憂而需水之鹽河轉虞淺阻黎培敬以此壩不堵則水有害而無利親詣河干相度形勢南洪水深四丈寬三十八丈南北經四百數十丈擇要施工河工各員均以工鉅費繁爲慮黎培敬引爲己任毅然爲之竟於是年臘月合龍臣抵任後檢閱舊牘見其與前督臣劉坤一商論一切水利情形切實詳明洞中肯綮而於屬員稟報工程之件尤悉心斟酌准駁攸宜故僚眾翕然推服遵行恐後竊歎其用心之苦而任事之誠也光緒七年伏汎大雨頻仍上游山泉漲發上自邵宿下訖揚州

奏稿卷六十

五

長河水勢有長至一丈以外者洪湖亦長水五尺有餘隄岸舊埽潰塌脫坡宵潮滲水險狀百出黎培敬督率河員堅守各壩裏下河農田乃得一次收穫易危爲安是年六月閒鹽城阜甯一帶復遭颶風之災海潮上湧葦蕩右營平地水深數尺兵民死傷者多田廬淹沒無數黎培敬急議捐賑掩骼埋胔造屋支棚全活者蓋數千口尤其謳思之最著者也此外戮海盜朱振剛而草澤之稔惡者懼設洪湖水保甲而民船之來往者安勸蠶織則有種桑之政備凶荒則有積穀之政設利濟局而民鮮失業之虞廣豐濟倉而民仰儲備之利其餘弭盜安良整軍經武嘉惠士林哀卹憊獨之政靡善不舉雖在任未久而設施爛然以故歌誦之聲至今未

深蓋其惠政之感人者深矣伏念黎培敬報績未終齎志而歿  
國家飾終之典固已備極

恩榮今該紳士等援黔省成案請於清淮建祠公道在人足徵遺  
愛查前漕臣文彬經前督臣劉坤一等合詞奏請奉

旨於清江浦地方准建專祠有案今黎培敬事體一律尤爲眾望  
所歸合無仰懇

天恩俯准於清淮建立專祠由地方官春秋致祭以彰蓋績而慰  
輿情出自

鴻施謹會同漕運總督臣慶裕江蘇巡撫臣衛榮光恭摺具陳伏  
乞

奏稿卷六十

五

皇太后

皇上聖鑒訓示謹 奏

軍機大臣奉

旨著照所請該部知道欽此

江蘇防營請從緩裁改摺

光緒九年四月十四日  
會江蘇巡撫衛榮光銜

奏爲江蘇防營仍難裁撤并易勇爲兵不無窒礙情形據實復陳仰祈

聖鑒事竊臣等承准軍機大臣字寄光緒八年十二月初四日奉上諭兵部奏請敕裁各省防勇確核兵額以節餉需一摺前因各省辦理軍務於制兵之外添募勇丁原爲一時權宜之計自軍務平定以來屢經諭令裁減見在各省尙存防勇二十餘萬歲需餉項爲數甚鉅國家經制有常度支竭蹶不可不力圖撙節如該部所稱查明各該省制兵缺額數目并將見存兵丁汰去老弱廢疾或再酌裁汎鋪其原缺與見裁兵額悉擇防勇之精壯者挑補仿直隸章程作爲練軍其餘設法裁撤自係爲節省饟需補救時艱起見著該大臣督撫等各就該省情形悉心酌度奏明辦理欽此卽經恭錄行令妥議詳辦去後茲據江蘇兩藩司會同籌防支應各局議詳前來臣等悉心體察謹披瀝爲我

皇太后

皇上陳之查綠營係屬舊制而軍興以後各省乃紛紛募勇卒之摧陷廓清削平大難者實惟勇力是賴是其得力與否固久在聖明洞鑒之中江蘇制兵本未全復舊額使其易勇爲兵因此得以盡復承平舊觀而得力亦復相等則臣等方以勇餉浩繁竊竊然慮其不繼豈有不願爲其易而爲其難者惟江蘇防營一時難

以裁減疊經各前督臣先後陳明其改勇爲兵情形判然各別恐難收效亦經前督臣李宗義於同治十三年正月奏復岑毓英議陳安危大計摺內詳細具奏各在案誠以綠營習氣染之甚易挽之甚難散處零星精壯者亦閱時而靡餉數驟減材武者將掉臂而行昔者兵事方殷幸以變計而收勇丁之用不逾時而以百練之銳任其潛墮於無形之中非臣等之所忍出者也

諭旨著各就該省情形酌度辦理仰見

朝廷於擲節餉需之中仍寓慎重防務之意查江蘇地控南洋江海礮臺重規疊矩碁布星羅全藉勇力周布分屯臨事尙慮不敷調遣目前海疆多事江海設防固未可稍涉鬆勁而本年海沭等

奏稿卷六十

五

處教匪勾結鄉民謠言起事雖經臣等飛調防勇立往巡防彈壓拏獲匪黨多名得以消患未萌而首惡未獲黨與尙多尤宜加意防範臣等竊以爲時事多艱隱憂方大正宜乘此講求武事以爲自強之計若竟將多年練成勁旅裁補兵額前功盡廢後患方滋外人觀聽最真竊恐生其輕視設一旦海上有警將何以禦外侮而靖內奸即使再爲招募之謀勞費豈可以道里計而臨渴掘井得力與否亦正未敢知語曰前事之不忘後事之師也臣等忝膺疆寄責有攸歸何敢出此所有江蘇省畱防各營應請從緩裁改俟海疆無事伏莽殲除再由臣等察看情形隨時奏明辦理而綠營制兵缺額仍不必遽行募足亦未始非擲節餉需之一端除漕

標防營應由漕督臣查明具奏外所有臣等查明會議緣由是否  
有當謹合詞恭摺復陳伏乞

皇太后

皇上聖鑒訓示謹 奏

奏稿卷六十

五

軍機大臣字寄光緒九年四月二十六日奉

上諭左宗棠衛榮光奏江蘇防營請從緩裁改一摺所奏自係實在情形卽著照所議辦理前據左宗棠等奏海沭等處教匪句結約期起事并據涂宗瀛等奏武漢地方教匪潛謀滋事疊經諭令該督撫等嚴拏匪首王覺一鄧玉亭等務獲究辦見聞常州一帶亦有匪徒劫掠之事獲匪訊供據稱其頭目在湖北及七濠口荆溪等處夥黨甚多等情如果屬實該匪等句結蔓延深恐釀成巨患亟應先事預防實力搜捕以除伏莽著左宗棠涂宗瀛衛榮光彭祖賢嚴飭各防營及該地方文武認真巡緝妥爲防範務將在逃各匪首迅速弋獲并將伏匪嚴密訪拏悉獲殲除總期銷患未

奏稿卷六十

五

萌不得稍涉大意將此由五百里各諭令知之欽此

飭造輕快船隻巡緝邵伯湖一帶片

光緒九年四月十四日

再江蘇省濱海臨江古稱澤國江南蘇松各屬有額設裏河水師五營及畱防太湖水師礮船分駐巡防地方賴以乂安而江北各屬港汊紛歧盜匪易於出沒揚州府屬之高寶邵伯一帶湖河相連村舍零落梟匪尤爲充斥商船夜泊咸有戒心非得輕快礮船扼要駐巡不足以資鎮懾見經臣飭造飛划三十號選募弁勇派委總兵陳能伸管帶作爲巡緝前營分駐巡緝并於船廠收繳船隻內挑選舳板八號配齊礮械交淮揚鎮總兵章合才派撥弁勇駕赴邵伯湖駐緝以安商旅而靖地方除飭取弁勇花名彙冊咨部外理合附片陳明伏乞

奏稿卷六十

七

聖鑒敕部查照謹 奏

軍機大臣奉

旨知道了欽此

